

AGENTENAN POLICIAL CU KIER TRASLADO A ACERCA MINISTRO NAVARRO

ORANJESTAD(AAN)—Durante e bishita cu Ministro Navarro di Justicia a realiza ayera na Aruba, aparentemente el a ser sorprendi pa un grupo di agente policial cu a pidi traslado pa otro isla y ainda no a ricibi un contesta di Gobierno Central.

Un encuentro entre e grupo y e Ministro no tabata ariba programa pero e Ministro lo a declara su mes dispuesto pa reuni cu e grupo den VIP Room di aeropuerto.

Un representacion chikito di e grupo cu lo ta basta grandi, y ta consisti di asina yama middenkader, mester a reuni cu e Ministro. Aparentemente e grupo lo ta consisti tambe di personanan dispuesto pa keda Aruba, pero nan kier ser poni na altura di nan posicion despues di Promer di Januari 1986.

PPA NO TA INCLINA PA FORMA PARTI DI GOBIERNO CU NO TIN CARACTER NACIONAL

ORANJESTAD(AAN)—E desaroyonan politico y e postura di PPA den esaki, tabata topico di un conversacion cu DIARIO a sostene ayera cu e lider politico di PPA, Benny Nisbet, promer cu e partido a duna inicio na un reunion interno.

Nisbet a bisa cu antayer e partido a ser informa cu MEP a pone un punto final tras di e intencionan pa yega na un Gabinete Nacional y durante un reunion di PPA a ser dicidi incidentalmente, na mes momento, cu PPA ta considera e intencionan termina. Sinembargo, antayeranochi y ayeramainta miembronan di PPA a ser informa di un intento nobo, cu lo mester tabata e ultimo, pa yega na formacion di un Gobierno nobo.

Segun Nisbet MEP a cambia su punto di vista, relaciona cu e hecho cu internamente no por a yega na un consenso. PPA a expresa duda cu si MEP lo por a forma quorum awemerdia pa nombra diputadonan nobo y segun Nisbet esey lo a induci pa e reunion ser convoca como ultimo intento pa yega na un Gabinete Nacional.

PPA no kier wordo usa pa MEP, Nisbet a bisa, mustrand cu si otro siman tin quorum, e partido PPA cu awe mester ta dispuesto pa yuda, lo ser poni un banda.

Pa loke ta trata e hecho cu PPA no a firma e telegram cu e otro instancianan presente ayeramainta a manda pa AVP, Nisbet a bisa cu su partido no kier a tuma parti ni pa AVP ni MEP pa motibo cu ambos a ocupa un posicion politico. Si Nisbet a bisa cu si realmente Betico Croes kier a yega na un Gabinete Nacional, di antemano el a retira como Consejero General, mescos cu e Diputadonan a tuma nan retiro.

Ademas si Betico Croes a entrega su retiro awor e lo por a ser nombra atrobe den tal posicion, si a resulta cu e lo no bira Diputado.

Encuanto e posibilidad pa PPA participa den un constelacion di Bestuurscollege cu no ta Nacional, Nisbet a bisa cu su partido mester a reuni ariba e asunto ainda, pero cu e tabata tin duda serio cu esaki lo ser acepta pa e partido, comoquiera cu si kier logra paz laboral, mester di un Gabinete Nacional y no por tin un partido den oposicion. PPA lo forma parti di Bestuurscollege, unicamente si e tin caracter nacional, ta e postura cu Nisbet a sinti lo keda acepta pa PPA.

Segun fuentenan MEP lo opta awe pa BETICO CROES DIPUTADO

ORANJESTAD(AAN)—Segun informenan ricibi for di fuentenan bon na altura, si awe yega na un posibilidad pa formacion di un Bestuurscollege Nacional, MEP lo bay opta pa Betico Croes keda nombra como candidato pa Diputado.

E Informantenan a bisa DIARIO, cu varios exponente di MEP lo ta favorece pa e lider di e partido awor haya un cartera di Diputado, aunke no por a ser bisa ainda cual ta e cartera cu tin pensa pa señor Betico Croes. E informe ta encera cu Betico Croes pues lo pasa di Consejero General di Gobierno pa Diputado.

BERDAD NUNCA A PER-
JUDICA NINGUN HENDE
NINGUN CAUSA NI NIN-
GUN NACION

DIARIO

DI ARUBA

Bo Matutino
Netamente Arubiano


DAVIERN 11 DI JANUARI 1985
AÑA 4, No. 1226

AVP no a presenta na reunion ayera AINDA NO A YEGA NA FORMACION GOBIERNO NACIONAL

ORANJESTAD(AAN)—Ayer mester a tuma lugar un reunion di politiconan y representantenan di gremionan pa trata na forma un Gobierno Nacional pa Aruba. For di promer momento ayera tabata visto cu no tur politico kier participa aparentemente den tal Gobierno Nacional, comoquiera cu e partido AVP no a presenta na e reunion. E independiente Spanner ta den exterior actualmente, y durante e reunion e partido PPA lo a bisa cu e mester tene consulta den su seno encuanto e asunto cu a keda discuti.

Segun informenan di parti di Camara di Comercio, ATIA, sindicatonan Uni, MEP, Independientenan de Palm y Kelly a ser dicidi pa manda un telegram pa AVP den cual ta ser pidi pa e partido participa na un reunion cu mester tuma lugar awemainta pa averigua si por yega na e Gobierno Nacional. Mientras un reunion publico di Consejo Insular a ser convoca awe, cu como punto di agenda nombramento di Diputadonan, segun informantenan si no yega na un Gabinete Nacional awemainta, e reunion di merdia lo ser cancela.

Mientrastanto ayera lo tabata e intencion pa PPA reuni internamente y evalua e situacion politico y participacion den Gobierno Insular.



Playa ayera a eligi su Reina Infantil cu a resulta di ta Heidi Croes, mientras cu Merelyn Gomez a bira runner up. Alavez na e ocasion Prins y Pancho Infantil Anthony y Ivan Matos a keda corona.